

Mvù Jân dé toò jògò

Ngòr mé lé naâ nùàr ñaá

¹ Béh bí hên nyagá njií kuú né felè ngòr mé né yòn haá. Mé wón lo nde duóm, sâ à lo dé seèn baá gi teèn. À lé naâ tieè beèh ngulí yilá, béh lé naâ bú ñené ndo. Né ka môn jég, béh lé naá gi bú mé njolo ñené, béh lé naâ bú mé be kema ndo.

² Yòn sâ yeé waà baá ká lètenè beèh, à ñené ñagá bèsonè, béh ñene ye bú mé njolo. Béh hên jue den né bí cí. Né yòn tètàgà mé lo naâ ké kwarè Tele seèn doô, à lé naâ njolò beèh ñené yuo kelâ.

³ Njií mé béh lé naâ ñené, mé béh lé naâ ñgweé sâ, béh hên tueé keéh né bí cí, te béh bí te bilí gi teèn bècènè. Dé beèh, béh bò Tele mé Nuna seèn Yeésò *Kristò te bilí gi aá kèn. Béh ye te béh bí doón te bilí gi ménâ ndo.

⁴ Béh bí mân nyagá kuú né ye te temé beèh die lè, béh samé gi mé gùm mene.

Ñagâ Càn

⁵ Béh hên tueé keéh né bí hùeh Yeésò Kristò: wa Càn né lom ñagásé tân ma. À mé bèh cibi déi yoòr teèn sam gùm doón.

⁶ Mo béh tueé né ye, béh baá yoòr Càn teé ndeé, mé béh né te cibi go den, sâ béh tueé né nyeén, seé beèh te ceér gécên sam.

⁷ Á, mo béh go né bèh ñagâ faá Càn nùà ñhèh né bèh ñagâ nɔ, sâ tueé né ye béh bí né gi bècénè teé bilí; sâ tueé cu né ye, húóm Nuna seèn Yeésò Kristò né béh veên yoòr yaga som gií ndɔ.

⁸ Mo béh ye, béh mé veên déi yoòr sam, sâ béh bele den cu né feh beèh mé be beèh, béh mé gècèn yoòr sam.

⁹ Nuaá mé né dé seèn bò veên seèn cie lòu tueé som seér, sâ Càn nde né bú bò veên seèn doón kulú som gií, à *sené nyegé bú ndɔ. Lòu sam, Càn né lom dilísé, à boó lom yeé jéjég faá à lé naâ tueé kwaá nɔ.

¹⁰ Mo béh ye béh bò vevenê bò sam, sâ béh mé ñgòr seèn lè sam, béh yoòr seèn Nùà ñhèh horó kwaá seér né nyeén.

2

**Kristò nùà gàm beèh.*

¹ Bò huaán mò, mè bí mvù hèn nyagá njií kuú né ye te bí veên bó cú. Ye mo lètenè biì nuaré déi né mene veên boó, te à ko ye, béh né mé nùà gàm beèh ké beè Tele beèh teèn ma; né Yeésò Kristò nùà dilí.

² À lé naâ feh seèn te cio mé yìè veên beèh semé njií, te Càn nde ye béh veên yoòr kulú som. Lélán dé beèh mé huún gí lòm ñgwéh, né dé bò nùàr *wón doón ndɔ.

³ Mo béh né sòn Càn ñgweé, béh nde né teèn ñené koó ye béh né Càn koó.

⁴ Mo nuaré déi ye nyí né Càn koó, mé à sòn Càn jòlò ñgwéh, sâ né nùà nyeên, à mé gècèn yoòr sam.

⁵ Nuaá mé né dé seèn ngòr Càṅ jolo, gwaán seér né Càṅ mé gècên mene kóó. Béh ñene kó yeé mé njéh ndo, ye béh né yoòr Càṅ nyogó ndeé.

⁶ Nuaá mé ye nyí nyogó den aá dé nyí yoòr Càṅ, sâ kó bú a, gò lòm ká nág faá Yeésò lé góó naá ndo.

Ngòr dé cuùm mé né den feésé

⁷ Bò mbeí mò, ngòr mé mè nyagá né hên njèh feê beè bìi sam; né ngòr cuùm mé bí lé naá giì ké bèh duóm ngweé. Ngòr sâ bí lé naá giì bú gwaán ndo.

⁸ Ngòr sâ né mene dé cuùm, mé njéh mene né feésé. Mè bí hên nyagá né cí. Gècên seèn né yoòr Yeésò Kristò ñené ñagá; né lè dene bìi ñené yuo kelâ ménâ ndo. Lòu sam, cibí baá ñellé yuo, ñagâ baá seér kóó baá; né ñagâ nùà njèh.

⁹ Nuaá mé ye nyí né bèh ñagâ, mé à né mbeí bunó dónj tueé né nyeén, à née den ka bèh cibí ye.

¹⁰ Nuaá mé né bò mbaábɔn gwaán, né seér bèh ñagâ kóó. Dé seèn, ndògò njií mé nùàr nde né teèn ceèn die bú yoòr sam.

¹¹ Dé nuaá mé né bò mbaábɔn bunó, môn sam; à dé seèn né te cibi, à né teèn go yon, cibí cib aá bú njolo, à lèmè kó cú.

¹² Bò huaán mò, Càṅ bí bò veèn bìi fɔ som gi aá kèn, né felè yilí Yeésò; mè bí hên nyagá kuú né dé cí.

¹³ Mé bí bò tele mò ndo, ngweéh nuaá mé lo naá logô teèn, te wónj nde ye duóm, bí né gi bú kóó mà; mè bí hên nyagá njií né dé cí. Mé bí bò

ndà mene, bí lé naâ *Sátàn taré yɔgó; mè bí hên nyagá njií né dé cî ndo.

¹⁴ Né cu mé bí bò huaán mò, bí né Càn Tele beèh kɔ́; mè bí nyagá njií né dé cî. Mé bí bò tele mò ndo, ɲgweéh nuaá mé lo naá logô teèn, te wón ɲde ye duɔóm, bí né gi bú kɔ́ mà; mè bí nyagá njií né dé cî. Mé bí bò ndà mene, bí né taré, bí né mé ɲgòr Càn lè, bí né Sátàn taré yɔgó; mè bí nyagá kuú né dé cî.

¹⁵ Bí té *wón gwàn, bí ɲgón bílí mé tò mò ɲhèh wón mene, wanɔ́n nuaá mé né wón gwaán, dé seèn Tele beèh Càn gwàn kòmò ndé ɲgwéh.

¹⁶ Bí kɔ́ ye, bò ɲhèh wón né mé ceér hihiné: tuaá veèn né bò nùàr lè li den; bó ɲhèh wón ɲéné téná bèh. Mɔ bó baá ɲgùlù wón yieé, bó né mé kàn lobo nyen le. Mè tueé bí, gèh dé sâ yuo yeé beè wón; ndóg beè Tele beèh Càn yùò bèh.

¹⁷ Kwá-re ɲɔ́n ndo; wón hèllè baá gií, bò njií mé bò nùàr né gwaán sâ baá nyoló ndeé. Nuaá mé bɔ́ né faá Càn gwaán nê nɔ, tètàgà le lom ɲde né kɔ́.

*Nùà bònò *Kristò*

¹⁸ Bò huaán mò, waà baá kèn! Bí lé naá gií ɲgweé, ye mɔ wón ɲde aá gií wa, nùà bònò Kristò ndeé né cu sâ waâ ma. Kènê bò bònò bò Kristò baá lom cie faá cí nɔ bomó sue; béh baá mé ɲhèh ɲéné kɔ́, ye hên baá bèh cerê sâ ndo.

¹⁹ Mé gècên mene, bò sâ bò lé yuoó naâ ká lètenè beèh. Mé ɲhèh mene bó lé dé beèh ná ɲgwéh. Mɔ bó sé lo né bò dé beèh, béh bó sé nées kɔ́ ye. Sâ dɔ́n bɔ́ gi né te béh ɲene ɲagá teèn, ye bò sâ bò te bòn beèh sam bòn.

²⁰ Dé bì môn sam. Dé bì Kristò lé naâ bí Cúcuí Nágâ yoòr nyeén kwaá gií, bí lé naâ bú kwa; bí né gi bò njèh dé gècên mé bú ñené kóó.

²¹ Mò mè né mene bí mân nyagá, sâ túé ñgwéh ye bí née gècên kó ñgwéeh ye; né seér ye bí né gècên kóó ma. Bí né gi kóó ndò, ye ñgòr gècên mé nyeén yoòr sam gùm doón.

²² Á sâ, nùà nyeên né neì? Sâ nùà nyeên né nuaá mé ye Yeésò *Nùà Còñ sam. Nùà bú sâ né nùà bùndò *Kristò, à beróñ bilí né Huaán mé Tele mene.

²³ Né yeé môn, nuaá mé né Huaán beróñ, beróñ né mé Tele mene; mò à né Huaán gwaán, sâ à gwaán né mé Tele mene ndò.

²⁴ Dé bì, bò njíí mé bí lé ñgwéé naâ ké bèh duóòm hên, bí lèr kwá nyégé lè bì bagasé. Mò bò njíí mé bí lé ñgwéé naâ ké bèh duóòm doô né gi lè bì te be sâ den den, sâ bí bò Tele mé Huaán nyógó bilí né kóó.

²⁵ Sâ ndéb mé Kristò lé kwa kwaá naâ béh tieè doô né yòñ tètàgà ndò.

²⁶ Mè bí nyagá kuú né felè bòó mé gwaán né bí beleè doô.

²⁷ Dé bì, bí kóó ye Kristò bí Cúcuí seèn yoòr nyeén kwaá gi aá kèn. Nuaré déi a, té bí njeré déi mbaá fèh kú cú, Cúcuí seèn né gi bí njèh doón feh den, à feh lom né bò njèh gècên gècên ndò, à ñgòr nyeên déi teèn fèh yí kèh bèh. Bí nyògò dèn jí yoòr Kristò, faá Cúcuí Nágâ né bí feh den ndò.

²⁸ Bò huaán mò, bí bò Kristò nyògò dèn lòu, te lòu mé à ndeè cuù, béh njeré déi nyàmè cú, te fegùlì ndeè béh toò seèn siè cú ndò.

²⁹ Bí né gi kóó ye Kristò né lom dilísé. Sâ bí kó nyégé-re bagasé ndɔ, ye nuaá mé né njèh teèn bɔó dilí yíí dɔóŋ né ŋunà Càn ma.

3

Bò ŋunà Càn

¹ Bí jògò ke ke gwaân mé Tele beèh Càn gwaân né béh kán ye! Ngweéh à béh yilá né bò ŋuna seèn mà. Né bòn, béh né lom bò ŋunà Càn. Bò *wónj bò dé bɔòn béh ŋéné kó ŋgwéh; lòu sam, bó Tele beèh Càn nùà njèh kó ŋgwéh.

² Bò mbeí mò, bí kóó ye, béh baá bò ŋunà Càn. Gèh dene mé né béh kela sâ née bèsonè ŋéné yùò kélá ŋgwéeh ye lòu. Mé njéh mene, béh né gi kóó ye: mɔ *Kristò ndeè ŋagá yuo kelà baá, béh bú ŋene nde né te be sâ, te béh den faá bú nɔ.

³ Sâ nuaá mé né ndèm yoòr Kristò mân kwaá njií dɔóŋ, bú a, dèn lòm ŋagásé faá Kristò né ŋagásé ndɔ.

⁴ Nuaá mé né veèn kema dɔóŋ sela né *sóú. Lòu sam, veèn né sóú selaà sâ.

⁵ Bí né gi kóó ye, Yeésò lé ká lè wónje nde kuú naâ bò nùàr veèn yoòr fɔ sɔòm, wanɔóŋ ndògò veèn déi lé yoòr seèn ná ŋgwèh gùm dɔóŋ.

⁶ Sâ nuaá mé nyogó den né yoòr seèn dɔóŋ, dé seèn veèn kèrà ndé cú. Nuaá mé né dé seèn veèn sela sɔó, née Yeésò Kristò ŋéné ŋgwéeh ye, sâ à bú kó ŋgwéh ndɔ.

⁷ Kúkùr bìi bò huaán mò, bí té gwàn mé nuaré déi bele bí! Bí kóó ye, nuaá mé né njèh bɔ́ díli dɔ́ɔ́, baá gi dilísé faá Yeésò Kristò né dilísé nɔ.

⁸ Nuaá mé né dé seèn mé veên kema ndeé den dɔ́ɔ́, né dé seèn nùà *Sátàn. Lòu sam, Sátàn né yeé môn, à lé veên bɔ́ duóóm naâ ké bèh duóóm ndɔ. Njuna Càṅ lé ká cie hên nde kuú naâ bò seé Sátàn hèllè nyoló sɔm.

⁹ Nuaá mé né njuna Càṅ dɔ́ɔ́, dé seèn veên sèlà ndé cú; dé seèn Càṅ baá Tele seèn kɔ́, à veên déi bó kòmò ndé cú, à dé seèn yoór baá seér mé kèkènè dé Càṅ.

¹⁰ Mɔ nùàr baá njuna Càṅ, bó nde né bú njené kɔ́, bó nde né bò dé Sátàn njené kɔ́ ndɔ: bòó mé njèh teèn bó díli yí njwéh, mé bò mbaáɔn gwàn njwéh dɔ́ɔ́, dé bɔ́n bò njuna Càṅ sam.

Gwaân lètenè bìi

¹¹ Bí lé naâ njòr hên ké bèh duóóm njweé gi, ye béh gwàn kú lètenè beèh gwaàn.

¹² Mɔ né mân, sâ béh té faá Kaïn nɔ dèn; né nùà Sátàn. À lé naâ òm seèn wulá. À lé òm wulá naâ mé njei wee? Njweéh sâ lé naâ mé ògòtì seé bɔ́n mà. Seé dé seèn lé naâ veénsé; seé dé òm dilísé. À lé òm wulá naâ mé njéh.

¹³ Bò nùàr mò, mɔ *wɔ́n baá mene bí bunó, bí té lòu géi sér.

¹⁴ Béh dé beèh te cio sam cuú, béh baá seér te yòṅe. Béh né gi ménâ kɔ́ nyegé; lòu sam, béh né bò mbeí beèh mé temé cén gwaán. Nuaá mé

mbeí mé temé cén gwàn ηgwéh née dé seèn te cio ye.

¹⁵ Nuaá mé né mbeí lè sie kwaá dɔ́ɔ́ɔ́ né nùà wúlá-nùàr. Bí né gi kɔ́ɔ́ ye nùà wúlá-nùàr dé seèn mé yòɔ́ tètàgà yoòr sam.

¹⁶ Dé Yeésò *Kristò né hiín; à gwaán lom né dé seèn nùàr mé temé cén, à lé cio beèh hèn ηa weh kuú naâ dé cî, béh ceér nùàr gwaán ηene kɔ́ né teèn sâ. Mɔ́ né mân, béh kè wèh teèn, te béh kuú felè bò mbeí beèh ménâ ndɔ́.

¹⁷ Wanɔ́ɔ́ɔ́ hèn mɔ́ nuaré dèi né mé ηgúlú beè, mbeí mé njéh sam, à mbeí jere kó ηgwéh, sâ à né mé temé Càn lè wa?

¹⁸ Bò huaán mò, béh bí té lòm nùàr mé lélán sòn mbaá gwàn nágá dèn, béh gwàn jí nùàr mé temé beèh mene, mé seé beèh mene dɔ́ɔ́ɔ́.

¹⁹ Mɔ́ béh né bò mbeí beèh mân gwaán, béh nde né teèn ηené kɔ́ɔ́ ye béh né bò huaán gècèn, sâ temé beèh nde né lè toò Càn die ndɔ́.

²⁰ Á, mɔ́ càn né béh lè mé njeré dèi tené, sâ mé njéh mene, béh ká toò Càn ndé ndé cû wa? Nηweéh Càn nùà njèh né temé beèh ηené yɔ́gɔ́ mà. Mè tueé bí, njèh dɔ́ɔ́ɔ́ né gi njolò Càn.

²¹ Bò mbeí mò, mɔ́ càn béh lè téné ηgwéh, sâ béh nde né njeré dèi toò seèn nyamé wa?

²² Béh né bú njèh dɔ́ɔ́ɔ́ bieé, à nde né béh haá, ye béh né ndéb nyí jolo, wa béh bɔ́ɔ́ né njií mé né nyí yoòr huɔ́m ma.

²³ Ndéb sâ né mân: Càn ye, kwá ní lòm temé cén yoòr Nuna nyí Yeésò Kristò, wa bí né lètenè

bii gwaán kuú ndo ma, te den faá à lé naá gií tueé kwaá no.

²⁴ Nuaá mé né sòn Càn ménâ jolo doón, dé seèn nyogó den né yoòr Càn; sâ Càn né bú yoòr teèn ndo. Mo béh bò Càn né kóó, béh ngweé ko né mé Cúcuí seèn yoòr beèh. Càn lé béh ménâ haá naâ kóó.

4

Cúcuí dé Càn mé cúcuí nùà bònò seèn

¹ Bò mbeí mò, mo nuaré déi waà, né njeré déi kwarè bii tueé den, wa nyí tueé né mé terreb Cúcuí Naga, bí té mbaá gwàn nji, bí kwé sér bú lòu. Mo à bí tueé né mé terreb Cúcuí dé Càn, bí nde né teèn ñené kóó. Wanóón bò *sòn-Càn bò dé nyenyenê baá *wón beè ñab sie.

² Mo né Cúcuí dé Càn, bí nde né bú dé seèn ñené kóó: nuaá mé né bèsonè tueé ñagá, wa né gècên, Yeésò Kristò lé naâ nùà ñaá ma, nuaá mé né ménâ tueé doón, tueé né mé Cúcuí dé Càn sâ.

³ Nuaá mé né dé seèn Yeésò lòu ñgoón seér doón, mé Cúcuí dé Càn lè sam; lè seèn né seér cúcuí nùà bònò Kristò. Bí lé naá gií ménâ ngweé, ye à baá ndeê. Hèn baá bú sâ, kènê à baá gií ká te wónje.

⁴ Mé ñjéh mene, bò huaán mò, bí baá gi dé bii bò dé Càn; bí né bò sâ bò taré yogó. Cúcuí Càn baá gi bí yoòr; taré kela né bú mé cúcuí bò wón bò hèllè.

⁵ Bò sòn-Càn bò dé nyenyenê sâ né dé bònò bò wón bò; bó tueé né ñjií mé wón gwaán nê, wón sòn bònò ngweé né dé cî.

⁶ Dé beèh môn sam, béh né dé beèh bò ñuna Càṅ. Nuaá mé né Càṅ kóó doṅ né gi dé seèn sòn beèh ṅweé. Nuaá mé ñuna Càṅ sam né sòn beèh lòu ṅgeén seér. Béh nùà Cúcuí gécên mé nùà cúcuí dé nyeên ṅene ko yeé mé njéh sâ.

Càṅ né léláṅ gwaân

⁷ Bò mbeí mò, béh gwàn kú lètenè beèh gwaân. Lòu sam, gwaân yuo yeé beè Càṅ. Nuaá mé né nùà mé temé cén gwaán doṅ né ñuna Càṅ, sâ nùà sâ né Càṅ kóó ndo.

⁸ Nuaá mé dé seèn nùà gwàn ṅgwéh, Càṅ kó ṅgwéh. Lòu sam, gùm Càṅ nùà njèh né gwaân sâ kóó.

⁹ À né lom béh mé temé seèn mene gwaán; à lé naâ gondoṅ Ñuna seèn ká te wóṅe temá njiî, ye te béh kwa yòṅ mé bú. À béh gwaân seèn bèsònè feh keéh né mé njéh.

¹⁰ Gwaân sâ túé ṅgwéh ye béh né Càṅ gwaán komo; Càṅ nùà njèh gwaán seér né béh kóó; à lé naâ Ñuna seèn ká lè wóṅe felè beèh temá njiî, à semé bú felè beèh, te à kulu som gi béh veên yoòr mé njéh.

¹¹ Bò mbeí mò, mo Càṅ né béh mân gwaán, sâ béh gwàn kú dèn lètenè beèh môn ndo.

¹² Wanṅóṅ nuaá mé lé naâ Càṅ mé njolo ṅené teèn sam. Mé njéh mene, mo béh né lètenè beèh mân gwaán kuú, sâ à né lè beèh teèn; sâ gwaân seèn nde né yoòr beèh jegé yuo kelâ.

¹³ Càṅ né béh Cúcuí seèn haá. Béh ṅene ko yeé mé njéh, ye béh né yoòr Càṅ nyogó den; ye à nyogó den né yoòr beèh ndo.

14 Béh lé naá giì mé njolo beèh ñené, ye Càᅇ Tele beèh lé naá ᅇuna seèn ká te wónᅇ temá njií, te *wónᅇ yili yuo mé bú. Béh né gi nùàr dᅇónᅇ ménâ tueé bele.

15 Nuaá mé né bèsonè tueé ᅇagá, ye bò nùàr a, Yeésò né ᅇuna Càᅇ dᅇónᅇ, nyᅇgᅇ den né yoòr Càᅇ; sâ Càᅇ né yoòr seèn nyᅇgᅇ den ndᅇ.

16 Gèh gwaân mé Càᅇ né béh gwaân hèn, béh né gi dé beèh yoòr beèh ᅇᅇweé kᅇᅇ, béh né lom temé teèn téᅇ kwaá njií. Lòu sam, gùᅇ Càᅇ nùà ᅇhèh né gwaân sâ. Nuaá mé né mbeí cu dᅇónᅇ gwaân, nyᅇgᅇ den né yoòr Càᅇ, sâ Càᅇ né yoòr seèn nyᅇgᅇ den ndᅇ.

17 Mᅇ béh né mé gwaân lè deí, sâ lòu téná-juù béh dé beèh ᅇjeré deí nyàmè ndé cú. Lòu sam, gèh dé mé Yeésò nê, béh né ká te wónᅇ mᅇn ndᅇ.

18 Mᅇ nùàr né mé gwaân lè, à ᅇjeré deí vèh ndé cú; gwaân mé né lè seèn doᅇ nde né veéh kwᅇgᅇ som. Lòu sam, mᅇ veéh né nùàr sie, sâ ndᅇn seèn weh né bú seé kᅇᅇ, ye bú a, wᅇ nde né gèr ᅇené ma. À sé yeé baá-re ménâ veéh, gwaân Càᅇ mé né bú yoòr doᅇ mbierré yuo ndᅇ.

19 Dé beèh, gwaân Càᅇ né gi béh lè. Lòu sam, à lé naá giì béh gwaân, te béh nde ye bú gwaân.

20 Mᅇ nuaré deí ye nyí né Càᅇ gwaân, mé à né mbeí seèn lòu bunó seér, sâ nùà sâ né lom nùà nyeên, wanᅇónᅇ à mbeí mé né njolᅇ seèn gwàn kᅇmᅇ ᅇᅇwéh, sé tagá Càᅇ mé à mé njolo ᅇéné bèh wa?

21 Ndéᅇ hèn Yeésò *Kristò tueé né mé sᅇn seèn ye: kᅇ nuaá mé né Càᅇ gwaân dᅇónᅇ, gwaân mbeí seèn ndᅇ, sâ ye.

5

**Wón yɔgô*

¹ Nuaá mé né temé kwaá njií, ye *Nùà Còṅ né Yeésò, dɔ́ṅ né ṅunà Càn. Sâ nuaá mé né Tele gwaán, nde né mé bò ṅuna seèn mene gwaán bilí ndo.

² Mo béh né Càn gwaán, mo béh né *sóú seèn jolo, béh nde né teèn ṅené kɔ́, ye sâ béh né bò ṅunà Càn gwaán.

³ Mo béh né Càn gwaán, sâ béh né sóú seèn jolo. Sóú sâ tétán yúlá ṅgwéh ndo.

⁴ Lòu sam, béh né bò ṅuna seèn; nuaá mé né ṅunà Càn dɔ́ṅ, né yeé wón yɔgô. Béh wón yɔgô né mé temé beèh yoòr Yeésò tég kwaá njií.

⁵ Neì wón yɔgô nde né kɔ́ wa? Mè tueé bí, gi cegé né nuaá mé né temé yoòr Yeésò kwaá njií, ye ṅunà Càn né bú.

*Bò njií mé tueé né sòn Yeésò *Kristò*

⁶ Yeésò Kristò nùà njèh lé naâ ká te wónje waâ; bó kou bú nòmò; à lé naâ kuú, húóm seèn ber. Lé dé lélán nòmò ná cégé ṅgwèh, lé naâ mé nòmò bô húóm mene. Cúcuí ṅagâ tueé né ménâ ndo, ye né lom gècên. Nùà gècên né cu Cúcuí sâ ndo.

⁷ Bò njií mé né gi sòn Kristò tueé né tagár:

⁸ Cúcuí né ménâ tueé, nòmò bô húóm tueé cu né ménâ ndo. Bò njèh tagár hèn tueé gi né mé sòn cên dɔ́ṅ.

⁹ Béh né gi kɔ́ ye bò nùàr né yeé béh njeré déi tueé, béh ṅgweé sòn boòn, sé tagá sòn dé Càn wa? Bí kékòò ye kela né sòn dé Càn mé dé

bò nùàr. Dé Càn, à tueé né felè Njuna seèn nùà njèh.

¹⁰ Sâ nuaá mé né temé cén yoòr Njuna Càn kwaá njií dɔ́ɔ́n, nde né yoòr seèn ngweé kɔ́ɔ́, ye né gècên. Nuaá mé temé yoòr Càn kwá ní ngwéh dɔ́ɔ́n, sie né Càn nyeén ndɔ́; wanɔ́ɔ́n Càn nùà njèh né mene mé sòn seèn felè Njuna seèn tueé ñagá, nùà hèllè seèn temé teèn kwá ní ngwéh nɔ́.

¹¹ Bèh hên tueé né sòn Yeésò sâ, ye Càn béh yòɔ́n tètàgà haá baá kèn; wa yòɔ́n sâ yuo yeé beè Njuna seèn ma.

¹² Sâ nuaá mé né beè Njuna seèn dɔ́ɔ́n né mé yòɔ́n sâ yoòr. Nuaá mé beè Njuna Càn dèn ngwéh, dé seèn mé yòɔ́n sâ yoòr sam.

Yòɔ́n tètàgà

¹³ Bí bòɔ́ mé né gi ndèm lè yilí Njuna Càn kwaá njií dɔ́ɔ́n, mè hên nyagá njií né mé bí, te bí kɔ́ nyegé ye bí baá mé yòɔ́n tètàgà teèn ma.

¹⁴ Béh njeré déi toò Càn nyàmè cú. Béh né gi bagasé kɔ́ɔ́ nyegé, ye mɔ́ béh né bú njeré déi te sòn seène dua yí wa, à nde né sòn beèh ngweé ma.

¹⁵ Mɔ́ béh né gi mân kɔ́ɔ́ nyegé, ye à né yeé sòn beèh ngweé, sâ béh kɔ́ gi aá kèn ye béh kwa baá njií sâ ndɔ́.

¹⁶ Mɔ́ nuaré déi ñene mbeí sela baá veèn mé nùàr te cio tùlù yí ngwéh, bú a, dùà lòm Càn felè mbeí hèllè tég; Càn nde né mbeí sâ yili som. Njèh cén, kɔ́ né ka veèn mé nùàr te cio tùlù yí ngwéh sâ ndɔ́. Veèn déi né teèn, né yeé nùàr te

cio tulu yíi. Mè túé ñgwéh ye bí dùà Càn te gèh bú sâ.

¹⁷ Bò seé vevenê né ñgún; doóné né gi núlú. Njèh cén, bò déi nùàr mé njéh kú ndé ñgwéh.

¹⁸ Béh né gi kóó ye, mo nùàr né ñunà Càn, à mé veên bó dèn ndé cú. Njuna Càn né bú cií nyegé, *Sátàn bú dé seèn cór ndé ñgwéh.

¹⁹ Béh né gi kóó ye, béh né dé beèh bò dé Càn, wa *wóné né dé seèn beè Sátàn.

²⁰ Béh né gi kóó ye, Njuna Càn lé naâ ká yoòr beèh waâ, à lé naâ béh feh komo logó, te béh ñene ko Càn gècên mé njéh. Béh yoòr Càn gècên sâ nyogó den né mé Njuna seèn Yeésò Kristò. Càn dé gècên gi lom né bú; yòñ tètàgà né lom bú ndó.

²¹ Bò huaán mò, bí gè lòm mé ceér cècàn noóné.

Mvù Ngòŋ Feê
Mambilla NT (Cameroon-Le Nouveau Testament en
mambila)

copyright © 2001 Wycliffe Bible Translators, Inc.

Language: Cameroon Mambila

Contributor: Wycliffe Bible Translators, Inc.

All rights reserved.

2025-05-13

PDF generated using Haiola and XeLaTeX on 13 May 2025 from source
files dated 13 May 2025

f0e8e7ba-c2cf-57f7-9a60-8ff0e792e158